

每週經課朗誦經文(巴克禮台語漢字)2014/05/04

共同經課 - 1

使徒行傳二章十四 a 節，三十六節～四十一節

14 總是彼得及十一個使徒倚啲，36 「按呢，以色列全家著確實知，此個耶穌，上帝已經設立伊做主，做基督，就是恁所釘仔十字架的。」37 眾人聽了，心內刺鑿，對彼得及其餘的使徒講：「兄弟啊，阮著怎樣做？」38 彼得給 in 講：「恁著反悔，逐人仔耶穌基督的名受洗禮，到互恁的罪赦免，閣欲受聖神的賞賜；39 因為所應允的歸仔恁及恁的子孫，以及攏總遠遠的人，就是見若主——咱的上帝所欲召的。」40 閣另外用多多話干證，來苦勸 in 講：「恁著救家已脫離此個邪的世代。」41 對按呢接納 in 的話的人攏受洗禮。彼日，約略加添三千人。

共同經課 - 2

詩篇一百一十六篇一節～四節，十二節～十九節

1 我疼耶和華，因為伊聽我的聲，我的懇求。2 伊已經俯耳孔聽我，所以我一世人欲求叫伊。3 死無的索纏著我；陰間的痛苦擒著我；我抵著患難憂苦。4 我就求叫耶和華的名，講：耶和華啊，今求你救我的生命！12 耶和華賞賜我一切的大恩我欲用甚麼報答伊？13 我欲捧起救恩的杯，求叫耶和華的名。14 我欲仔伊眾百姓的面前對耶和華謝我的願。15 耶和華看伊聖的百姓的死做真寶貝。16 耶和華啊，我實在是你的奴僕；我是你的奴僕，是你女婢的子。你已經解開捆縛我的索。17 我欲用感謝的祭獻互你，閣欲求叫耶和華的名。18 我欲仔伊眾百姓的面前，對耶和華謝我的願，19 仔耶和華厝的院內，仔你耶路撒冷的中間。恁著謳唵耶和華！

共同經課 - 3

彼得前書一章十七節～二十三節

17 無用外貌取人、是照逐人的行做來審判的，恁若求叫伊做父，就著存驚畏來經過恁寄腳仔世間的時陣，18 因為知恁受贖，脫出對祖公所流傳空空的行做，毋是用會敗壞的物，或是銀抑是金，19 是用寶血，親像無瑕疵、無污穢的羊仔的就是基督的血。20 伊仔未創造世間的時是所代先知的，就仔諸個時的路尾為著恁著現的。21 恁對伊來信上帝，就是互伊對死人中復活的、也互伊榮光，致到恁的信及向望向仔上帝。22 恁對順趁真理，已經清氣恁的神魂，致到疼兄弟無假，就著對心切切相疼。23 恁已經重頭生，毋是對會敗壞的種，是對袂敗壞的種，對上帝的道理是活是久長仔啲的。

共同經課 - 4

路加福音二十四章十三節～三十五節

13 像彼日，學生中有二人去一個鄉社；名以馬忤，離耶路撒冷二十五里。14 in 相及談論所經過攏總的事。15 in 啲談論相問的時，耶穌本身近倚，及 in 相及行；16 in 二人迷目，致到袂認得伊。17 伊對 in 講：「恁行的時相及辯論的是甚麼話？」in 就倚啲，面帶憂容。18 其中一個名革流巴應伊講：「你豈單身出外仔耶路撒冷，也毋知近日仔遐所經過的事嗎？」19 伊給 in 講：「甚麼事啊？」in 給伊講：「就是拿撒勒人耶穌的事。伊是先知人，仔上帝及眾百姓的面前，所講所行有權能。20 也許個祭司頭及咱的序大解送伊，去定死罪，釘伊仔十字架。21 若是阮平素啲向望伊，就是彼個欲贖回以色列的。毋若按呢，閣諸個事成，已經三日啦。22 閣阮中間幾若個婦仁人互阮真印愕；因為 in 拍拂光到墓裡，23 無看見伊的身屍，就來講，in 有看見天使出現，講伊復活啦。24 阮中間幾若人到墓裡，果然看見照婦仁人所講的；總是無看見伊。」25 耶穌對 in 講：「無知的人啊，先知所講一切的話，恁的心怎樣許攏(oh)信啊！26 基督受諸個艱苦，來入伊的榮光，豈毋應該嗎？」27 就對摩西及眾先知起，見若聖經中所指伊的攏給 in 解明。28 將近所去的鄉社，耶穌親像欲行卡遠，29 二人強留伊講：「請及阮住，時已經晏，日欲落啦！」伊就入去，欲及 in 住。30 相及坐桌的時，耶穌提餅，祝謝，擘來互 in。31 in 的目睭開，就認得伊。連鞭無閣看見。32 in 就相及講：「路裡，伊及咱講話，開拆聖經的時，咱的心豈無熱嗎？」33 就即時起身，倒去耶路撒冷，抵著十一個學生及同仔啲的人聚集，34 啲講：「主果然復活，也出現互西門看見。」35 in 二人也講起仔路裡所抵著的事，及仔擘餅的時 in 怎樣認得伊。